



ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ ՈՐՈՇՈՒՄ

26 ապրիլի 2023 թվականի թիվ 28 -Ա

ք. Երևան

«ԳԼՈՐԱԼ ՔՈՆԹԵՆԹ ՍԵՐՎԻՍ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՎԱՐՉԱԿԱՆ ՏՈՒՅԺ ԿԻՐԱՌԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով 2023 թվականի մարտի 06-ին իր նախաձեռնությամբ հարուցված թիվ 2 վարչական վարույթի նյութերը՝ **պարզեց**.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս՝ հայտնաբերել է Օրենքի պահանջի խախտում, այն է՝ տեսալսողական ծրագրերի դիստրիբյուտոր հանդիսացող «ԳԼՈՐԱԼ ՔՈՆԹԵՆԹ ՍԵՐՎԻՍ» ՍՊ ընկերությունը (այսուհետ՝ դիստրիբյուտոր) գործել է առանց «СуперГерой» տեսալսողական ծրագիրը ներառող ծանուցում ներկայացնելու՝ խախտելով Օրենքի դրույթի պահանջը:

«ԷՉՆԵԹ» ՍՊ ընկերությունը (այսուհետ՝ ցանցային օպերատոր) Հանձնաժողով 2023 թվականի փետրվարի 27-ի գրությամբ ներկայացրել է տեղեկություն՝ իր ցանցում վերահաղորդվող տեսալսողական ծրագրերի մասին: Նշված ցանկում ներառված է նաև «СуперГерой» տեսալսողական ծրագիրը և որպես իրավատեր նշված է «ԳԼՈՐԱԼ ՔՈՆԹԵՆԹ ՍԵՐՎԻՍ» ՍՊ ընկերությունը:

Վերոնշյալ տեղեկատվության իսկությունը պարզելու նպատակով Հանձնաժողովը 2023 թվականի մարտի 01-ի թիվ 04-140 գրությամբ ցանցային օպերատորից պահանջել է դիստրիբյուտորի հետ կնքված պայմանագրերի պատճենները:

2023 թվականի մարտի 03-ի գրությամբ ցանցային օպերատորի կողմից ներկայացվել է իր և դիստրիբյուտորի միջև 2022 թվականի հունվարի 30-ին կնքված թիվ 007-02/23 Լիցենզիոն համաձայնագրի պատճենը, որի գործողության ժամկետն է 01.02.2023թ.-31.12.2023թ. և «СуперГерой» տեսալսողական ծրագիրը ցանցային օպերատորին վերահաղորդման իրավունքով փոխանցված տեսալսողական ծրագրերի ցանկում է, սակայն դիստրիբյուտորը նշված տեսալսողական ծրագիրը ներառող տեսալսողական ծրագրերի վերաբերյալ ծանուցում Հանձնաժողով չի ներկայացրել:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով՝ 2023 թվականի մարտի 06-ին դիստրիբյուտորի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2023 թվականի մարտի 07-ին ծանուցել է դիստրիբյուտորին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Հարուցված վարչական վարույթի ընթացքում դիստրիբյուտորը 2023 թվականի մարտի 20-ին Հանձնաժողով ներկայացրած իր պարզաբանման մեջ նշել է, որ «**СуперГерои**» տեսալսողական ծրագրի անվանումը «**Малыш**» տեսալսողական ծրագրի բրենդային անվանումն է, որով այն հանդես է գալիս օպերատորների ցանցում:

Դիստրիբյուտորն իր պարզաբանմանը կից ներկայացրել է նաև «Լյուքս Սինեմա» (ООО«Люкс Синема») ՍՊ ընկերության գրությունն ուղղված «ՏՊՕ ՌԵԴ ՄԵԴԻԱ» (ООО«ТПО Ред Медиа») ՍՊ ընկերությանն այն մասին, որ «Լյուքս Սինեմա» (ООО «Люкс Синема») ՍՊ ընկերությունը, որպես զանգվածային լրատվության միջոց գրանցված «**Канал Малыш**» (**գրանցման վկայական՝ СМІ серия ЭЛ № ФС 77 - 82315 փրված 23.11.2021թ.**) մանկական տեսալսողական ծրագիրը նախատեսում է հեռարձակել «СуперГерои» բրենդային անվանումով:

Արձանագրենք նաև այն փաստը, որ դիստրիբյուտորի կողմից 2022 թվականի հունվարի 14-ին գրությամբ ներկայացվել է «ՏՊՕ ՌԵԴ ՄԵԴԻԱ» (ООО«ТПО Ред Медиа») ՍՊ ընկերության հետ կնքված 2021 թվականի դեկտեմբերի 01-ի թիվ 24 համաձայնագիրը, որը հանդիսանում է 2021 թվականի մարտի 30-ի թիվ РМ-167-11/08/12 Պայմանագրի լրացումը: Թիվ 24 Համաձայնագրով հաստատված տեսալսողական ծրագրերի թվում է նաև «**Малыш ТВ**» տեսալսողական ծրագիրը, որ գրանցման վկայականի համարն է՝ **СМІ серия ЭЛ № ФС 77 - 66401, փրված 14.07.2016թ.** և լիցենզիայի գործողության ժամկետ է սահմանված 2017 թվականի փետրվարի 01-ից մինչև 2023 թվականի դեկտեմբերի 31-ը:

Հանձնաժողովը հարուցված վարչական վարույթի շրջանակներում 2023 թվականի մարտի 23-ին գրությամբ կրկին դիմել է դիստրիբյուտորին և հայտնել, քանի որ Հանձնաժողովի տիրապետությամբ է գտնվում միայն վերջինիս կողմից միայն 2022 թվականի հունվարի 14-ին Հանձնաժողով ներկայացված թիվ 24 Համաձայնագրի լրացումը (30.03.2012թ. թիվ N РМ-167-11/08/12 պայմանագրի), ապա անհրաժեշտություն է առաջացել իրենց լրացուցիչ բացատրությունները, ինչպես նաև այլ պաշտոնական փաստաթղթեր՝ ըստ որի «СуперГерои» անվանումը «Малыш» տեսալսողական ծրագրի բրենդային անվանումն է:

Հեռարձակողի կողմից հարուցված վարչական վարույթի ընթացքում որևէ այլ բացատրություն և պարզաբանում այս հարցի վերաբերյալ Հանձնաժողով չի ներկայացվել:

Հանձնաժողովի հիմնավորումները (պարզաբանությունը) և եզրահանգումը.

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

Օրենքի 1-ին հոդվածի 2-րդ մասը սահմանում է՝
«2. Սույն օրենքը սահմանում է տեսալսողական մեդիաձառայություն մատուցողների և օպերատորների կարգավիճակը, կանոնակարգում է հեղինակագործան, լիցենզավորման, ծանուցումների ներկայացման կարգը, սույն օրենքի կարգավորման առարկա հանդիսացող սուբյեկտների իրավունքների ու պարտականությունների առաջացման հիմքերը, գործունեության ընթացքում ծագող հարաբերությունները»:

Օրենքի 1-ին հոդվածի 4-րդ մասի 3-րդ կետի համաձայն՝ սույն օրենքի գործողությունը տարածվում է Հայաստանի Հանրապետությունում՝ տեսալսողական ծրագրերի դիստրիբյուտորների վրա:

Իսկ Օրենքի 3-րդ հոդվածի 1-ին մասի 2-րդ կետի համաձայն՝ **կարգավորող պետական մարմին**՝ անկախ պետական մարմին, որն ապահովում է հեռարձակվող լրատվության միջոցների ազատությունը, անկախությունը և բազմազանությունը, վերահսկում է Հեռարձակողների, օպերատորների և տեսալսողական ծրագրերի դիստրիբյուտորների գործունեությունը:

Օրենքի 3-րդ հոդվածի 1-ին մասի 10-րդ կետը սահմանում է.

«տեսալսողական ծրագրերի դիստրիբյուտոր» Հեռարձակողի հետ պայմանագրի հիման վրա օպերատորին տարածման նպատակով տեսալսողական ծրագրեր տրամադրող ֆիզիկական կամ իրավաբանական անձ:»:

Վերոգրյալից հետևում է, որ անձը ձեռք է բերում դիստրիբյուտորի կարգավիճակ Հեռարձակողի հետ կնքված պայմանագրի ուժով: Պայմանագրի կնքման պահից էլ վերջինս հանդիսանում է պայմանագրում ներառված տեսալսողական ծրագրերի դիստրիբյուտոր:

Օրենքի 54-րդ հոդվածի 1-ին և 2-րդ և 4-րդ մասերը սահմանում է.

«1. Տեսալսողական ծրագրերի դիստրիբյուտորը գործում է օրենսդրության համաձայն կարգավորող պետական մարմին ծանուցում ներկայացնելուց հետո:

2. Յուրաքանչյուր նոր տեսալսողական ծրագրի վերաբերյալ ներկայացվում է ծանուցում:

4. Կարգավորող պետական մարմինը ծանուցումը հաստատում է 20-օրյա ժամկետում:»:

Համաձայն Օրենքի 49-րդ հոդվածի 1-ին մասի՝ Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

Օրենքի 49-րդ հոդվածի 5-րդ մասը սահմանում է.

«Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին:»:

Օրենքի 60-րդ հոդվածի 8-րդ մասի համաձայն՝ Օրենքն ուժի մեջ մտնելուց հետո ցանցային օպերատորները կարգավորող պետական մարմին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

Հանձնաժողովի կողմից ուսումնասիրվել են վարչական վարույթի նյութերը և առաջնորդվելով ինչպես գործում առկա, այնպես էլ ներկայացված ապացույցներով, ուսումնասիրության արդյունքում Հանձնաժողովն ամրագրում է, որ ղեկավարվելով Օրենքի 49-րդ հոդվածի 5-րդ մասի և 60-րդ հոդվածի 8-րդ մասի դրույթներով՝ ցանցային օպերատորը Հանձնաժողով ներկայացրել է տեղեկություն՝ իր ցանցում վերահաղորդվող տեսալսողական ծրագրերի մասին:

Հանձնաժողովը որպես տեսալսողական մեդիայի ոլորտը կարգավորող պետական մարմին Օրենքով վերապահված իր վերահսկողական լիազորություններն իրականացնելիս ուսումնասիրել է ցանցային օպերատորի կողմից Հանձնաժողով ներկայացված վերահաղորդվող տեսալսողական ծրագրերի ցանկը, ուսումնասիրել է ցանցային օպերատորի և դիստրիբյուտորի միջև կնքված տեսալսողական ծրագրերի վերահաղորդման իրավունքը հաստատող Համաձայնագիրը: Այդ ուսումնասիրություններն իրականացնելիս՝ համադրության արդյունքում, արձանագրվել է, որ ցանցային օպերատորը դիստրիբյուտորի հետ կնքված

Համաձայնագրի համաձայն 2023 թվականի փետրվարի 01-ից իրավունք է ստացել վերահաղորդելու «СуперГерои» տեսալսողական ծրագիրը և այդ տեսալսողական ծրագիրը ներառված է վերջինիս կողմից ներկայացված տեսալսողական ծրագրերի ցանկերում:

Հանձնաժողովի կողմից ուսումնասիրվել է նաև Դիստրիբյուտորի կողմից և՛ 2022 թվականի հունվարի 14-ին գրությամբ ներկայացված «ՏՊՕ ՌԵԴ ՄԵԴԻԱ» (ООО«ТПО Ред Медиа») ՍՊ ընկերության հետ կնքված 2021 թվականի դեկտեմբերի 01-ի թիվ 24 համաձայնագիրը, և՛ սույն վարչական վարույթի շրջանակներում վերջինիս պարզաբանումը և ներկայացված «Լյուքս Սինեմա» (ООО«Люкс Синема») ՍՊ ընկերության գրությունն ուղղված «ՏՊՕ ՌԵԴ ՄԵԴԻԱ» (ООО«ТПО Ред Медиа») ՍՊ ընկերությանն և փաստում է հետևյալը՝

Դիստրիբյուտորը ծանուցել է Հանձնաժողով և ստացել թույլտվություն՝ **«Малыш ТВ»** տեսալսողական ծրագրի, որ գրանցման վկայականի համարն է՝ **СМИ серия ЭЛ № ФС 77 - 66401, տրված 14.07.2016թ.** վերաբերյալ (փաստենք նաև ըստ դիստրիբյուտորի նշված տեսալսողական ծրագիրը «СуперГерои» բրենդային անվանումով հեռարձակելու մտադրության մասին ևս Հանձնաժողովին մինչ վարչական վարույթ վերսկսելը չէր տեղեկացվել), իսկ վարչական վարույթի պարզաբանմանը կից փաստաթղթից պարզ է դառնում, որ «Լյուքս Սինեմա» (ООО «Люкс Синема») ՍՊ ընկերությունը, որպես զանգվածային լրատվության միջոց գրանցված **«Канал Малыш» (գրանցման վկայական՝ СМИ серия ЭЛ № ФС 77 - 82315 տրված 23.11.2021թ.)** մանկական տեսալսողական ծրագիրն է նախատեսում է հեռարձակել «СуперГерои» բրենդային անվանումով:

Ելնելով վերոգրյալից, փաստենք, որ դիստրիբյուտորը Հանձնաժողով չի ներկայացրել **նոր որպես զանգվածային լրատվության միջոց գրանցված «Канал Малыш» (գրանցման վկայական՝ СМИ серия ЭЛ № ФС 77 - 82315 տրված 23.11.2021թ.)** տեսալսողական ծրագրի ծանուցում (բրենդային անվանումը՝ «СуперГерои») Հանձնաժողով, Օրենքով սահմանված ժամկետում, Հանձնաժողովը չի հաստատել նշված ծանուցումը և ցանցային օպերատորի հետ կնքելով թիվ 007-02/23 Լիցենզիոն համաձայնագիրը, գործունեություն է իրականացրել առանց Հանձնաժողով տեսալսողական ծրագիրը ներառող ծանուցում ներկայացնելու:

Այսպիսով, վարչական վարույթի նյութերի ուսումնասիրության արդյունքում ամրագրում ենք, որ Օրենքի 54-րդ հոդվածի 1-ին մասով տեսալսողական ծրագրերի դիստրիբյուտոր հանդիսացող անձի համար պարտավորություն է սահմանված Հայաստանի Հանրապետության տարածքում գործել օրենսդրության համաձայն Հանձնաժողով ծանուցում ներկայացնելուց հետո, իսկ համաձայն Օրենքի 54-րդ հոդվածի 2-րդ մասի՝ յուրաքանչյուր նոր տեսալսողական ծրագրի վերաբերյալ նույնպես Հանձնաժողով ներկայացնել ծանուցում:

Փաստում ենք նաև, որ Օրենքի գործողությունը Հայաստանի Հանրապետությունում տարածվում է տեսալսողական ծրագրերի դիստրիբյուտորների վրա (Օրենքի 1-ին հոդված 4-րդ մասի 3-րդ կետ) և դիստրիբյուտորը հանդիսանալով ցանցային օպերատորներին տարածման նպատակով տեսալսողական ծրագրեր տրամադրող իրավաբանական անձ, պարտավոր է պահպանել տեսալսողական մեդիայի բնագավառը կարգավորող օրենսդրության պահանջները, իսկ օրենքի դրույթները խախտելու դեպքում կրել պատասխանատվություն օրենքով սահմանված կարգով, ուստի, օրենքի պահանջի չկատարումն ինքնին բերում է պատասխանատվության:

Դիստրիբյուտոր պետք է հաշվի առնի, որ օրենքներով հստակ սահմանվում են իրավական նորմեր, որոնց չպահպանելն առաջացնում են իրավական հետևանքներ և դիստրիբյուտորը պատասխանատվություն է կրում տեսալսողական մեդիայի ոլորտը կարգավորող

օրենսդրության կիրառման ապահովման համար և տվյալ դեպքում դիստրիբյուտորը պարտավոր էր պահպանել Օրենքի 54-րդ հոդվածի 1-ին մասով սահմանված դրույթի պահանջը:

Հարուցված վարչական վարույթի ընթացքում դիստրիբյուտորի կողմից ներկայացված բացատրությունների ուսումնասիրման արդյունքում Հանձնաժողովն արձանագրում է, որ դրանք հիմնավոր չեն, քանի որ Օրենքով դիստրիբյուտորի համար պարտավորություն է սահմանված Հայաստանի Հանրապետության տարածքում գործել Հանձնաժողով ծանուցում ներկայացնելուց հետո միայն, իսկ տվյալ դեպքերում դիստրիբյուտորը չի կատարել Օրենքի պահանջը:

Այսպիսով, դիստրիբյուտորի բացատրությունները հիմնավոր և բավարար հիմք չեն իրավախախտման փաստը բացառելու և դիստրիբյուտորի նկատմամբ օրենքով սահմանված կարգով պատասխանատվություն չկիրառելու համար: Ուստի վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ խախտվել է Օրենքի 54-րդ հոդվածի 1-ին մասով սահմանված պահանջը և դիստրիբյուտորի կողմից թույլ է տրվել իրավախախտում, որը համապատասխանում է Օրենքի 57-րդ հոդվածի 25-րդ մասի հատկանիշներին:

Օրենքի 32-րդ հոդվածի 1-ին մասի 11-րդ կետի համաձայն՝ կարգավորող պետական մարմինը՝ Օրենքի խախտման կամ իր որոշումները չկատարելու դեպքում կիրառում է պատասխանատվության միջոցներ:

Օրենքի 55-րդ հոդվածի 1-ին մասի համաձայն՝ կարգավորող պետական մարմնի կողմից տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու, ինչպես նաև պետական այլ մարմինների կողմից իրենց իրավասությունների շրջանակում տեսալսողական մեդիայի բնագավառը կարգավորող օրենսդրության պահանջների խախտման դեպքեր հայտնաբերվելու և դրանց մասին կարգավորող պետական մարմնին գրավոր տեղեկացվելու դեպքում կարգավորող պետական մարմինը կիրառում է հետևյալ վարչական տույժերը.

- 1) գրավոր նախազգուշացում.
- 2) տուգանք.
- 3) հեղինակազորման կամ լիցենզիայի գործողության կասեցում.
- 4) հեղինակազորման կամ լիցենզիայի գործողության դադարեցում:

Օրենքի 57-րդ հոդվածի 25-րդ մասը սահմանում է.

«25. Առանց սույն օրենքի 54-րդ հոդվածով սահմանված ծանուցման գործունեություն իրականացնելը՝

առաջացնում է տուգանքի նշանակում՝ սահմանված նվազագույն աշխատավարձի հինգհարյուրապատիկի չափով»:

Ելնելով վերոգրյալից, ղեկավարվելով «Տեսալսողական մեդիայի մասին» օրենքի 1-ին հոդվածի 1-ին մասի 2-րդ և 4-րդ մասի 3-րդ կետով, 3-րդ հոդվածի 1-ին մասի 2-րդ և 10-րդ կետերով, 32-րդ հոդվածի 1-ին մասի 11-րդ կետով, 54-րդ հոդվածի 1-ին և 4-րդ մասերով, 55-րդ հոդվածի 1-ին մասի 2-րդ կետով և հիմք ընդունելով «Տեսալսողական մեդիայի մասին» օրենքի 57-րդ հոդվածի 25-րդ մասը՝ Հեռուստատեսության և ռադիոյի հանձնաժողովը **որոշեց**.

1. «ԳԼՈՐԱԼ ՔՈՆԹԵՆԹ ՍԵՐՎԻՍ» ՍՊ ընկերության նկատմամբ կիրառել վարչական տույժ՝ տուգանելով սահմանված նվազագույն աշխատավարձի հինգհարյուրապատիկի չափով:

2. Սույն որոշումն ուժի մեջ է մտնում այն «ԳԼՈՐԱԼ ՔՈՆԹԵՆԹ ՍԵՐՎԻՍ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ
ՀԱՆՁՆԱԺՈՂՈՎԻ ՆԱԽԱԳԱՀ՝**

S. ՀԱԿՈԲՅԱՆ

26 ապրիլի 2023թ.

ք. Երևան